

TERENGGANU

ENAKMEN 2 TAHUN 2001

ENAKMEN PENTADBIRAN HAL EHWAL AGAMA ISLAM (TERENGGANU)

BAHAGIAN V - KEWANGAN

Zakat dan Fitrah

Seksyen 70. Kuasa Majlis memungut zakat dan fitrah.

Majlis hendaklah berkuasa memungut zakat dan fitrah daripada setiap orang Islam yang kena dibayar di dalam Negeri Terengganu mengikut Hukum Syarak bagi pihak Duli Yang Maha Mulia Sultan.

Seksyen 71. Pengawal, Timbalan Pengawal, Nazir dan Amil.

Majlis hendaklah menjadi Pengawal Zakat dan Fitrah bagi Negeri Terengganu dan bolehlah dia melantik Timbalan-Timbalan Pengawal, Nazir Zakat, Penolong Nazir Zakat, Amil, dan Penolong-Penolong Amil bagi tiap-tiap mukim masjid sebagaimana yang difikirkan perlu.

Seksyen 72. Taksiran zakat.

(1) Majlis hendaklah menyediakan, dari semasa ke semasa sebagaimana dia fikirkan perlu, taksiran-taksiran berkenaan dengan orang-orang yang kena membayar zakat, menunjukkan kadar dan banyaknya serta tempoh masa mereka itu kena bayar, dan menyampaikan taksiran-taksiran itu kepada mereka.

(2) Majlis hendaklah berkuasa untuk mendapat apa-apa maklumat daripada mana-mana orang yang menganut Agama Islam yang boleh dikenakan membayar zakat atau fitrah.

Seksyen 73. Rayuan.

(1) Mana-mana orang bolehlah membuat rayuan kepada Majlis terhadap mana tuntutan bayaran zakat atau fitrah ke atasnya.

(2) Majlis hendaklah menimbangkan rayuan itu dan boleh memerintahkan bahawa orang itu hendaklah membayar amaun zakat atau fitrah yang dituntut ke atasnya, atau amaun yang kurang, sebagaimana difikirkan patut oleh Majlis, atau boleh memerintahkan bahawa orang itu tidak dikehendaki daripada membayar zakat atau fitrah di dalam sesuatu tahun.

(3) Keputusan Majlis terhadap rayuan itu adalah muktamad dan tidak boleh dipersoalkan lagi di dalam mana-mana mahkamah.

Seksyen 74. Tanggungan membayar zakat.

(1) Zakat hendaklah dikeluarkan oleh setiap orang Islam yang menghasilkan padi, jagung, atau lain-lain makanan asas yang ditetapkan oleh Majlis dari semasa ke semasa mengikut Hukum Syarak, yang penghasilannya tidak kurang daripada 5 ausuq (600 gantang Baghdad) atau yang bersamaan dengannya dalam mana-mana satu tahun, pada kadar yang tidak lebih daripada sepuluh peratus jumlah penghasilannya itu.

(2) Tertakluk kepada subseksyen (3), zakat kerbau lembu hendaklah dikeluarkan pada kadar berikut:

Tidak kurang daripada 30 tetapi ...	seekor anak lembu atau kerbau berumur tidak kurang daripada satu tahun.
tidak lebih daripada 39 ekor	
Tidak kurang daripada 40 tetapi ...	seekor anak lembu atau kerbau berumur tidak kurang daripada dua tahun.
tidak lebih daripada 59 ekor	
Tidak kurang daripada 60 tetapi ...	dua ekor anak lembu atau kerbau berumur tidak kurang daripada satu tahun.
tidak lebih daripada 69 ekor	

(3) Bagi jumlah lembu atau kerbau yang lebih daripada 69 ekor, maka kadarnya hendaklah ditentukan mengikut beberapa kali jumlah itu boleh dibahagikan dengan tiga puluh atau empat puluh ataupun kedua-duanya dan dengan itu, bagi tiap-tiap 30 ekor yang genap, kadarnya ialah seekor anak lembu atau kerbau yang berumur tidak kurang daripada satu tahun, dan bagi tiap-tiap 40 ekor genap, kadarnya ialah seekor anak lembu atau kerbau yang berumur tidak kurang daripada dua tahun.

(4) Zakat kambing atau biri-biri hendaklah dikeluarkan pada kadar yang berikut:

Tidak kurang daripada ...	seekor biri-biri yang berumur tidak kurang daripada satu tahun atau seekor kambing yang berumur tidak kurang daripada dua tahun.
40 tetapi tidak lebih daripada 120 ekor	
Tidak kurang daripada ...	dua ekor biri-biri yang berumur tidak kurang daripada satu tahun atau dua ekor kambing yang berumur tidak kurang daripada dua tahun.
121 tetapi tidak lebih daripada 200 ekor	
Tidak kurang daripada ...	tiga ekor biri-biri yang berumur tidak kurang daripada satu tahun atau tiga ekor kambing yang berumur tidak kurang daripada dua tahun.
201 tetapi tidak lebih daripada 399 ekor	
Bagi 400 ekor ...	empat ekor biri-biri yang berumur tidak kurang daripada satu tahun atau empat ekor kambing yang berumur tidak kurang daripada dua tahun.

Selepas daripada itu, bagi tiap-tiap 100 ekor genap, ditambahkan seekor biri-biri atau kambing yang berumur tidak kurang daripada dua tahun.

(5) Zakat hendaklah dikeluarkan di atas harta benda selain daripada yang tersebut di dalam subseksyen (1), (2) dan (4) sebagaimana berikut:

(a) bagi emas, yang mulai kena dikeluarkan zakat ialah yang beratnya 20 *mithqal* atau lebih, pada kadar 2 ½ peratus daripada jumlah nilai harga emas yang dimiliki itu;

(b) bagi perak, yang mulai kena dikeluarkan zakat ialah yang beratnya 200 dirham atau lebih, pada kadar 2 ½ peratus daripada jumlah nilai harga perak yang dimiliki itu;

(c) bagi barang perniagaan, yang mulai kena dikeluarkan zakat ialah nilai harganya menyamai 20 *mithqal*, pada kadar 2 ½ peratus daripada jumlah nilai harga barang perniagaan yang dimiliki itu;

(d) bagi emas atau perak yang dijumpai sebagai rikaz, pada kadar 20 peratus daripada jumlah nilai harta yang dijumpai itu.

Seksyen 75. Tanggungan membayar fitrah.

(1) Fitrah hendaklah dibayar oleh sekalian penduduk yang beragama Islam di dalam negeri ini,

melainkan mereka yang dikecualikan daripada membayarnya oleh Hukum Syarak, dan kadar pembayaran bagi setiap orang ialah satu gantang Baghdad beras atau lain-lain makanan asas yang ditetapkan oleh Majlis dari semasa ke semasa mengikut Hukum Syarak atau dengan wang tunai sebanyak sebagaimana yang ditetapkan dari semasa ke semasa oleh Majlis dengan kelulusan Duli Yang Maha Mulia Sultan.

(2) Satu gantang Baghdad adalah bersamaan dengan tiga kati dua belas tahlil atau bersamaan dengannya.

Seksyen 76. Pembayaran zakat

Zakat padi, jagung, atau lain-lain makanan asas yang ditetapkan oleh Majlis dari semasa ke semasa mengikut Hukum Syarak hendaklah dibayar dengan padi, jagung, atau lain-lain makanan asas atau dengan wang tunai menurut nilai harganya sebagaimana yang ditetapkan oleh Pengawal dari semasa ke semasa.

Seksyen 77. Pembayaran fitrah.

Fitrah bagi mana-mana tahun hendaklah dibayar kepada mana-mana pegawai yang dilantik di bawah seksyen 71 tidak lewat daripada 1 haribulan Syawal yang berikutnya.

Seksyen 78. Resit-resit dan kira-kira.

(1) Majlis hendaklah mengeluarkan resit-resit yang berseturut nombornya di dalam borang yang ditetapkan bagi tiap-tiap pengeluaran zakat dan fitrah, sama ada dengan wang tunai atau dengan benda yang dikeluarkan.

(2) Semua zakat dan fitrah yang diterima oleh Majlis hendaklah dimasukkan kira-kira dan hendaklah dipegang, disimpan, dan diselenggarakan oleh Majlis mengikut cara sebagaimana yang diperintah oleh Duli Yang Maha Mulia Sultan dengan nasihat Majlis.

(3) Majlis hendaklah menyebabkan supaya semua kira-kira zakat fitrah itu diaudit, bagi maksud ini Majlis bolehlah melantik dan menggaji pegawai-pegawai audit.

Seksyen 79. Kuasa membuat peraturan-peraturan.

Majlis dengan persetujuan Duli Yang Maha Mulia Sultan boleh membuat peraturan-peraturan untuk mengawalselia semua perkara yang berhubungan dengan pungutan, pentadbiran dan pembahagian zakat dan fitrah.